



回想佇臺中ê彼幾年

彼款佇疼ê內面自由行踏、體驗上帝，是佬爾仔予人懷念！

文、圖 | 陳致綸 / 台北南門教會青年，師大台文所碩士生

做出外人ê大學生活


到今，猶會記得頭擺踏入佇大肚山腰ê校園時，彼款對新環境 kap 未來生活的期待 kap 歡喜；跔校園行踏散步，享受四圍大學氣氛，猶是感覺欲開始佇臺中、佇這ê會當看著廣闊台灣海峽ê所在生活，若像咧眠夢。

受地方教會 kap 大專團契陪伴

因為父母攏無讀大學，所以對我干焦要求一項事：毋通離開教會，愛會記得去做禮拜。就因為按呢，揣著離學校上近ê沙鹿教會，閣揀我去參加大專團契。在我攏是真生分ê經驗，這毋只是我頭擺成做「出外人」，閣是孤身跔佇這過去毋捌深刻熟似過ê城市，去認捌、去探索遮的人，去品嚐這ê城市ê氣味，其實心內不免淡薄仔緊張。我已經袂記得跔臺中ê頭一暝是按怎暍落眠ê，總是我干

焦會記得，我不斷咧對家己講：「對這馬開始，就真正愛對所行、所做完全負責矣，無人會閣替我設法，替我『拭尻川』」囉！」

總是這款緊張並無維持蓋久，因為生活當中予我操煩ê大、細項代誌，佇沙鹿教會青少年團契，抑是大專長青，攏通揣著分享、改故壓力ê管道，也佇同工服事ê過程中，彼此結連、交陪相通；閣因為靜宜弘光長青ê關係，也得著東榮教會濟濟關心。通講，教會 kap 團契ê生活，大大消除對新環境ê不安，予我通倚在面對所欲來的新挑戰。了後，對臺中那熟似，就漸漸對參與者，轉換做籌備者，對我來講閣較是無全款ê挑戰。檢采佇高中時就經歷過活動籌備ê辛苦 kap 壓力，毋過佇大專階段所愛考慮的各種因素，是超過進前所經驗--ê；總是因為按呢，我通認捌無全學校、無全背景ê朋友 kap 同工，也佇當中彼此相疼。



懷念佇疼內面ê日子

這霎已經離開臺中兩年外矣，猶不時會想起彼幾年，我佇台中、佇海線、佇沙鹿生活、賴賴趁ê日子，彼款佇疼ê內面自由行踏、體驗上帝，是佻爾仔予人懷念！🍷



本文母語聲音QR Code